

UČEŠĆE NA III GODIŠNJEM SASTANKU

RADNE GRUPE ZA REVIZIJU OPĆINA

U Lisabonu, Portugal, 10. i 11. oktobra 2019. godine održan je treći godišnji sastanak Radne grupe za reviziju općina Evropske organizacije vrhovnih revizijskih institucija (EUROSAI TFMA) i seminar na temu „Funkcije koje obavljaju općine“. Radna grupa za reviziju općina Evropske organizacije vrhovnih revizijskih institucija osnovana je 2016. godine, na inicijativu Ureda za reviziju Litvanije, a trenutno je čini 28 članica vrhovnih revizijskih institucija.

Događaju je prisustvovalo preko 70 predstavnika iz 25 vrhovnih revizijskih institucija. U radu ove grupe ispred Ureda za reviziju institucija u FBiH učestvovala je Amela Mulahalilović, revizorka u Sektoru za finansijsku reviziju institucija kantona, gradova i općina.

Tokom seminara su razmijenjena iskustva o radu općina u različitim zemljama, analizirani su načini finansiranja općina i proces decentralizacije, te predstavljeni rezultati provedenih revizija pojedinih revizijskih institucija.

Na sastanku je zaključeno kako općine, kao nivo vlasti najbliži građanima, trebaju služiti građanima i djelovati efikasno s obzirom na to da su i uspostavljene isključivo za njih. Najvažnije je ocijeniti koji će nivo upravljanja pružati javne usluge koje najbolje odgovaraju potrebama građana, a da se pritom javna sredstva najracionalnije troše. Demografske promjene, razvoj informacionih tehnologija, promjena navika i mobilnost građana zahtijevaju dodatne javne usluge, zbog čega rad općina kontinuirano mora biti predmet pregleda i analiza.

Prezentirani su i rezultati provedenih istraživanja u prethodnom periodu i preliminarni plan aktivnosti Radne grupe za 2020. godinu.

